

四庫全書

集部

欽定四庫全書

萬首唐人絕句卷十三

宋 洪邁 編

五言

郭隗

陳子昂

逢時獨為貴，歷代非無才。  
隗君亦何幸，遂起黃金臺。

入峽苦風寄親友

故鄉今日友，歡會坐應同。  
寧知巴峽路，辛苦石尤風。

題田洗馬桔槔

望花長為客商山遂不歸誰憐北陵客未息漢陰機

古意

白雲蒼梧來氤氳萬里色聞君太平代栖泊靈臺側

子夜四時歌

郭元振

春歌二首

青樓含日光綠池起風色贈子同心花殷勤此何極  
陌頭楊柳枝已被春風吹妾心正斷絕君懷那得知

秋歌二首

邀懽空佇立，望美頻回顧。  
何時復採菱，江中密相遇。  
辟惡茱萸囊，延年菊花酒。  
與子結綢繆，丹心此何有。

冬歌二首

北極嚴氣昇，南至溫風謝。  
調絲競短歌，拂枕憐長夜。  
帷橫雙翡翠，被卷兩鴛鴦。  
婉態不自得，宛轉君王牀。

王昭君

聞有南河信，傳言殺畫師。  
始知君念重，更肯惜娥眉。

春江曲

江水春沈沈，上有雙竹林。  
竹葉壞水色，郎亦壞人心。

堂堂

李義府

懶整鴛鴦被，羞塞玳瑁牀。  
春風別有意，密處也尋香。

賦美人

鏤月成歌扇，裁雲作舞衣。  
自憐回雪影，好取洛川歸。

詠烏

日裏颺朝彩，琴中伴夜啼。  
上林如許樹，不借一枝棲。

洛隄步月

上官儀

脉脉廣川流，驅馬歷長洲。  
鵲飛山月曉，蟬噪野風秋。

塞下曲六首

盧綸

鷲翎金僕姑，鷲尾繡螯弧。  
獨立揚新令，千營共一呼。  
林暗草驚風，將軍夜引弓。  
平明尋白羽，沒在石稜中。  
月黑鴈飛高，單于夜遁逃。  
欲將輕騎逐，大雪滿弓刀。  
野幕蔽瓊筵，羌戎賀勞旋。  
醉和金甲舞，雷鼓動山川。  
調箭又呼鷹，俱聞出世能。  
奔狐將迸雉，掃盡古丘陵。

亭亭七葉貴蕩蕩一隅清他日題麟閣唯應獨不名

天長地久詞三首

玉砌紅花樹香風不敢吹春光解天意偏發殿南枝  
虹橋千步廊半在水中央天子方消暑宮人重暮妝  
辭輦復當熊傾心奉上宮君王若看鏡甘在衆妃中

妾薄命

妾年初二八兩度嫁狂夫薄命今猶在堅貞掃地無

酬李益

戚戚一西東十年今始同  
可憐歌酒夜相對兩衰翁

長門怨

空宮古廊殿寒月落斜暉  
卧聽未央曲滿箱歌舞衣

春詞

北苑羅裙帶塵衢錦繡鞋  
醉眠芳樹下半被落花埋

山下泉

皇甫曾

漾漾帶山光澄澄倒林影  
那知石上喧却憶山中靜

題畫帳二首

皇甫冉



朝見巴山客暮見巴山客雲帆儻暫駐中路陽臺夕  
湘水風日滿楚山朝夕空連峰雖已見猶念長雲中

送王司直

西塞雲山遠東風道路長人心勝潮水相送過尋陽

有懷

舊國迷江樹他鄉近海門移家南渡久童稚解方言

淮口寄趙員外

欲逐淮潮上暫停漁子溝相望知不見終是屢回頭

初出沅江夜入湖

放溜出江口回瞻松枯深不知舟中月那引湖間心

渡汝水向大和山

落日花攀折西南投一峰誠知秋水淺但怯無人蹤

月下作

霜風驚度鴈月露皎疎林處處砧聲發星河秋夜深

遠山

少室盡西峰鳴臯隱南面柴門縱復關今日窻中見

南澗

上客各乘軒高朋盡鳴玉寧知飲澗人自愛輕波淥

山館

山館長寂然閑雲朝夕來空庭復何有落日照青苔

使仔春怨

花枝繞建章鳳管出昭陽借問承恩者雙蛾幾許長

秋怨

長信多秋氣昭陽借月華那堪閉永巷聞道選良家

贈寄權三客舍

南橋春日暮楊柳帶清渠不得同攜手空城意有餘

望南山雪懷山寺普上人

夜夜夢蓮宮無由見遠公朝來出門望知在雪山中

病中對石竹花

數點空階下閒凝細雨中那能久相伴嗟爾滯秋風

送人還剡中舊居

海岸耕殘雪溪沙釣夕陽家中何所有春草漸看長

遠客

行隨新樹深夢隔重山遠  
迢遞風日間蒼茫洲渚晚

禁省梨花

巧解迎人笑還能亂蝶飛  
春風時入戶幾片落朝衣

送裴陟歸常州

夜雨頻停棹秋風暗入衣  
見君常北望何事却南歸

洪澤館壁見故禮部尚書題詩

底事洪澤壁空留黃卷詞  
年年淮水上行客不勝悲

銅雀妓二首

崔道融

嚴妝垂玉筓妙舞對清風  
無復君王顧春來起漸慵  
歌咽新翻曲香銷舊賜衣  
陵園風雨暗不見六龍歸

春閨二首

寒食月明雨落花香滿  
泥佳人持錦字無鴈寄征西  
欲剪宜春字春寒入剪刀  
遼陽在何處莫望寄征袍

訪僧不遇

尋僧已寂寞林下鎖山房  
松竹雖無語牽衣借晚涼

田上

雨足高田白披蓂半夜耕人牛力俱盡東方殊未明

月夕

月上隨人意人閑月更清朱樓高百尺不見到天明

槿花

槿花不見夕一日一回新東風吹桃李須到明年春

西施灘

宰嚭亡吳國西施陷惡名浣沙春水急似有不平聲

江上逢故人

故里琴樽侶相逢近臘梅江村買一醉破淚却成吟

牧豎

牧豎蓬叢笠逢人氣傲然卧牛吹短笛耕却傍溪田

過農家

欲羨農家子秋新看刈禾蘇秦無負郭六印又如何

江夕

江心秋月白起柁信潮行蛟龍化為人半夜吹笛聲



春墅

蛙聲近過社農事忽已忙鄰婦餉田歸不見白花芳

江村

日暮片帆落江村如有情獨對沙上月滿船人睡聲

擬樂府子夜四時歌四首

吳子愛桃李月色不到地明朝欲看花六宮人不睡  
涼軒待月生暗裏螢飛出低回不稱意蛙鳴亂清瑟  
月色明如晝蟲聲入戶多狂夫自不歸滿地無天河

銀缸照殘夢零淚霑粉臆洞房猶自寒何況關山北

寄人二首

花上斷續雨江頭來去風相思春欲盡未遣酒尊空  
澹澹長江水悠悠遠客情落花相與恨到地一無聲

江鷗

白鳥波上棲見人懶飛起為有求魚心不是戀江水

春晚

三月寒食時日色濃於酒落盡牆頭花鶯聲隔原柳

漢宮詞

獨詔宮衣出天花落殿堂他人不敢妬垂淚向君王

旅行

少壯經勤苦衰年始浪遊誰憐不龜手他處却封侯

班婕妤

寵極辭同輦恩深棄後宮自題秋扇後不敢怨春風

有題

十載元正酒相歡意轉深自量麋鹿分只合在山林

古樹

古樹春風入陽和力太遲莫言生意盡更引萬年枝

春題二首

青春未得意見花却如讎路逢白面郎醉挿花滿頭  
滿眼桃李花愁人如不見別有惜花人東風莫吹散

長安春

長安牡丹開繡轂輾晴雷若使花長在人應看不回

病起二首

病起春已晚  
曳筇傷綠苔  
強攀庭樹枝  
喚作花未開  
庭起繞庭除  
春泥粘屐齒  
如從萬里來  
骨肉滿面喜

峽路

清猿啼不住  
白水下來新  
八月莫為客  
夜長愁殺人

長門怨

長門春欲盡  
明月照花枝  
買得相如賦  
君恩不可移

月夕有懷

圓光照一海  
遠客在孤舟  
相憶無期見  
中宵獨上樓

夜泊九江

夜泊江門外歡聲月裏樓明朝歸去路猶隔洞庭秋

寒食夜

滿地梨花白風吹碎月明大家寒食夜獨貯望鄉情

歸燕

海燕頻來去西人獨滯留天邊又相送腸斷故園秋

長安春

珠箔映高柳美人紅袖垂忽聞半天語不見上樓時

漢宮曲二首

韓翃

駿馬踏障泥紅塵撲四蹄歸時何太晚日照杏花西  
繡幙珊瑚鉤香閨翡翠樓深情不肯道驕倚鈿箜篌

別離作

戎昱

手把杏花枝未曾輕別離黃昏掩門後寂寞心自知

贈薛瑤英

賈至

舞怯銖衣重笑疑桃臉開方知漢成帝虛築避風臺

浴中有懷

于武陵

潺潺伊洛河寂寞隔恩波鑾駕不東幸洛陽春草多

送魏山田處士西遊

陰陰亭際閑相顧慘離顏一片雲飛去嵯峨空魏山

長春宮

莫問古宮名古宮空古城唯應東去水不改舊時聲

高樓

遠天明月出照此誰家樓上有羅衣裳涼風吹不秋

歡酒



勸君金鏤卮滿酌不須辭  
花發多風雨人生足別離

萬首唐人絕句卷十三

欽定四庫全書

萬首唐人絕句卷十四

宋 洪邁 編

五言

寒食下第

武元衡

柳挂九衢絲花飄萬家雪如何憔悴人對此芳菲節  
途中即事

南征復北還擾擾百年間自笑春塵裏生涯不暫閒

春日偶作

縱橫桃李枝淡蕩春風吹美人歌白紵萬恨在蛾眉

夏夜作

夜久喧暫息池臺惟月明無因駐清景日出事還生

寒食日同陳六游山院

年少輕行樂東城南陌頭與君寂寞意共作草堂游

喜遇劉二十八

裴度

病來佳興少老去舊游希笑語縱橫作孟觴絡繹飛

送劉

不歸丹掖去銅竹漫云云唯喜因過我須知未賀君

再送

頃來多謔浪此夕任喧紛故態猶應在行期未要聞

房公舊竹亭聞琴

李德裕

流水音長在青霞意不傳獨悲形解後誰聽廣陵絃

題羅浮石

清景持芳菊涼天倚茂松名山何必去此地有羣峯

無題

松倚蒼崖老蘭臨碧澗衰不勞隣舍笛吹起舊時悲

題冠蓋里

偶來冠蓋里媿是舊三公自喜無兵術輕裘上闕宮

雪霽晨起

雪覆寒溪竹風卷野田蓬四望無行跡誰憐孤老翁

題奇石

蘊玉抱清暉閒庭日蕭洒塊然天地間自是孤生者

上張相公寫舊唱和詩

賦感鄰人笛詩留夫子墻延年如有作應不用山王

和晉公三首

李紳

鳳儀常欲附蚊力自知微願假罇壘末膺門自此依  
貂蟬公獨步鴛鷺我同羣插羽先飛酒交鋒便著文  
窮陰初莽蒼離思漸氛氲殘雪午橋岸斜陽伊水濱

古風二首

春種一粒粟秋成萬顆子四海無閒田農夫猶餓死

鋤禾日當午汗滴禾下土誰知盤中食粒粒皆辛苦

題玉潭

獨孤及

碧玉徒強名冰壺難比德唯當寂照心可並齋淪色

春日歸家

李嘉祐

自覺勞鄉夢無人見客心空餘庭草色日日伴愁襟

遠寺鐘

踈鐘何處來度竹蕪拂水漸逐微風歛依依猶在耳

白鷺

江南淶水多顧影逗輕波終日秦雲裏山高奈若何

樂府

陸長源

芙蓉初出水菡萏露中花風吹著枯木無奈值空槎

白銅鞮

徐凝

騷裊錦障泥樓頭日又西留歡住不住素齒白銅鞮

陽叛兒

哀怨陽叛兒駘蕩郎知否香死博山爐煙生白門柳

春寒



亂雪從教舞回風任聽吹春寒能作底已被柳條欺

廬山獨夜

寒空五老雪斜月九江雲鐘聲知何處蒼蒼樹裏聞

天台獨夜

銀地秋月色石梁夜溪聲誰知屐齒盡為破烟苔行

送寒巖歸士

不挂絲纈衣歸向寒巖棲寒巖風雪夜又過巖前溪

送陳司馬

家寄茅洞中身游越城下寧知許長史不憶陳司馬

武夷山仙城

武夷無上路毛徑不通風欲共麻姑住仙城半在空

避暑二首

一株金染密數畝碧鮮疎避暑臨溪坐何妨直釣魚  
斑多筒簟冷髮少角冠清避暑長林下寒蟬又有聲

浙西李尚書奏廢淫昏廟

傳聞廢淫祀萬里靜山陂欲慰靈均恨先燒靳尚祠

酬相公再遊雲門寺

遠羨五雲路透迤千騎回遺簪唯一去貴賞不重來

杭州祝濤頭二首

不道沙堤盡猶欺石棧頑寄言飛白雪休去打青山  
倒打錢塘郭長驅白浪花吞吳休得也輸却五千家

晚春別

韓琮

晚日低霞綺晴山遠畫眉青青河畔草不是望鄉時

銜魚翠鳥

楊巨源

有意蓮葉間  
瞥然下高樹  
擘破得全魚  
一點翠光去

和鄭相公尋宣上人  
不遇

方尋蓮境去  
又值竹房空  
幾韻飄寒玉  
餘清不在風

題范陽金臺驛

六國唯求客  
千金遂築臺  
若令逢聖代  
憔悴郭生回

耗磨日飲

趙冬曦

春來半月度  
俗忌一朝閒  
不酌他鄉酒  
無堪對楚山

長安秋望

杜牧

樓倚霜樹外鏡天無一毫南山與秋色氣勢兩相高

獨酌

牕外正風雪擁爐開酒缸何如釣船雨蓬底睡秋江

醉眠

秋醪雨中熟寒齋落葉中幽人本多睡更酌一尊空

不飲贈酒

細算人生事彭殤共一籌與愁爭底事要爾作戈矛

過田家宅

安邑南門外誰家板築高  
奉誠園裏地墻缺見蓬蒿

獨柳

含煙一株柳拂地搖風久  
佳人不忍折悵望回纖手  
將赴湖州題亭菊

陶菊手自種楚蘭心有期  
遙知渡江日正是擷芳時  
折菊

籬東菊徑深折得自孤吟  
雨中衣半濕擁鼻自知心  
哭李給事中敏

陽陵郭門外坡陁丈五墳九泉如結友茲地好埋君

黃州竹邕

竹岡蟠小邕屈折闕虵來三年得歸去知遠幾千回

題寺樓

暮景千山雪春寒百尺樓獨登還獨下誰會我悠悠

入松院小石

雨滴珠璣碎苔生紫翠重故關何日到且看小三峯

送人遊湖南

賈傅松醪酒秋來美更香  
憐君片雲思一棹去瀟湘

籌筆驛

郵亭寄人世人世寄郵亭  
何如自籌度鴻路有冥冥

寄遠

隻影隨驚雁單栖鎖畫籠  
向春羅袖薄誰念舞臺風

送盧秀才

春潮與煙遠送君孤棹開  
潺湲如不改愁更釣魚來

醉題



金鑷洗霜鬢銀觥敵露桃醉頭扶不起三丈日還高

山莊

好鳥疑敲磬風蟬認軋箏脩篁與嘉樹偏倚半巖生

盆池

鑿破蒼苔地偷他一片天白雲生鏡裏明月落階前

有寄

雲濶煙深樹江澄水浴秋美人何處在明月萬山頭

寄遠人

終日求人卜回回道好音那時離別後入夢到如今

別沈處士

舊事參差夢新程迤邐秋故人如見憶時到寺東樓

歸家

稚子牽衣問歸來何太遲共誰爭歲月贏得鬢成絲

遣懷

道泰身還泰時來命不來何當離城市高臥博山隈

江樓

獨酌芳春酒登樓已半醺誰驚一行雁衝斷過江雲

驪驪坂二首

瑤池罷游宴良樂委塵沙遭遇不遭遇鹽車與鼓車

荊州一萬里不如蒯易度仰首望飛鳴伊人何異趣

憶鄱陽舊遊

顧況

悠悠南國思夜向江南泊楚客腸斷時月明楓子落

夢後吟

醉中還有夢身外已無心明鏡唯知老青山何處深

題靈山寺

覺地本隨身靈山重結因如何戰鳥佛不化捕魚人

題元陽觀舊讀書房贈李範

此觀千年游此房千里宿還來舊窻下更取君書讀

永嘉

東甌傳舊俗風日江邊好何處樂神聲夷歌出烟島

青弋江

淒清回泊夜淪波激石響村邊草市橋月下罟師網

聽山鷓鴣

誰家無春酒何處無春鳥  
夜宿桃花村踏歌接天曉

臨平塢雜題十三首

山逕柳

宛轉若游絲淺深栽綠掩  
年年立春後即被啼鶯占

石上藤

空山無鳥跡何物如人意  
委曲結繩文離披草書字

薜荔菴

薜荔作禪庵重疊庵邊樹空山徑欲絕也有人知處

芙蓉樹

風擺蓮衣乾月背鳥巢寒文魚翻亂葉翠羽上危欄

歌松漪

湛湛碧漣漪老松歌側卧悠揚綠蘿影下拂波紋破

焙茶塢

新茶已上焙舊架憂生醜旋旋續新烟呼兒劈寒木

彈琴谷

谷中誰彈琴琴響谷冥寂因君扣商調草蟲驚暗壁

白鷺汀

霍靡汀草碧淋森鷺毛白夜起沙月中思量捕魚策

千松嶺

終日吟天風有時天籟止問渠何旨意恐落凡人耳

黃菊灣

時菊凝曉露露華滴秋灣仙人釀酒熟醉裏飛空山

臨平湖

采藕平湖上藕泥封藕節船影入荷香莫衝蓮柄折

山春洞

引燭踏仙泥時時亂乳燕不知何道士手把靈書卷

石竇泉

吹沙復噴石曲折仍圓旋野客激流時杯粘落花片

古仙壇

遠山誰放燒疑是壇邊醮仙人錯下山拍手壇邊笑

題鄱陽蕭寺



不知何世界有處似南朝石路無人掃松門被火燒

題山頂寺

遙聞林下語知是經行所日暮香風時諸天散花雨

天寶題壁

五十餘年別伶俚道不行却來書處在惆悵似前生

哭李別駕

故人行跡滅秋草向南悲不欲頻回步孀妻正哭時

春雨不聞百舌

百舌春來啞愁人共待晴不關秋水事飲恨亦無聲

驚雪

陸暢

怪得北風急前庭如月輝天人寧許巧剪水作花飛

聞早蟬

落日早蟬急客心聞更愁一聲來枕上夢裏故園秋

別劉端公

連騎出都門秋蟬噪高柳落日辭故人自醉不關酒

貞女墓

邵謁

生持節操心死作堅貞鬼至今墳上春草木無花卉

送友人江行

送君若浪水疊疊愁思起夢魂若月明相送秋江裏

瞽者歎

我心豈不平我目自不明徒云備雙足天下何由行

萬首唐人絕句卷十四

欽定四庫全書

萬首唐人絕句卷十五

宋 洪邁 編

五言

散關遇雪

李商隱

劍外從軍遠無家與寄衣散關三尺雪回夢夢鴛機

樂遊

向晚意不適驅車登古原夕陽無限好只是近黃昏

巴江柳

巴江可惜柳柳色綠侵江  
好向金鑾殿移陰入綺窓

聽鼓

城頭疊鼓聲城下暮江清  
欲問漁陽慘時無禰正平

憶梅

定定住天涯依依向物華  
寒梅最堪恨長作去年花

漫成二首

沈約憐何遜延年毀謝莊  
清新俱有得名譽底相傷

霧夕詠芙蓉何郎得意初此時誰最賞沈范兩尚書

柳下暗記

無奈巴南柳千條傍吹臺更將黃映白擬作杏花媒

妓席

樂府聞桃葉人前道得無勸君書小字切莫喚官奴

風

撩釵盤孔雀惱帶拂鴛鴦羅薦誰教近齋時鎖洞房

代應

昨夜雙鉤敗今朝百草輸  
關西狂小吏唯唱遠牀盧

張亞子廟

下馬捧椒漿迎神白玉堂  
如何鐵如意獨自與姚萇

百果嘲櫻桃

珠寶雖先熟瓊芋縱早開  
流鶯猶故向爭得諱含來

荅

衆果莫相誚天生名品高  
何因古樂府唯有鄭櫻桃

襪

嘗聞宓妃襪渡水欲生塵好借常娥著清秋踏月輪  
追代盧家人嘲堂內

道却橫波字人前莫漫羞只應同楚水長短入淮流

天涯

春日在天涯天涯日又斜鶯啼如有淚為濕最高花

早起

風露澹清晨簾間獨起人鶯花啼又笑畢竟是誰春

細雨



惟飄白玉堂簾卷碧牙牀  
楚女當時意蕭蕭髮彩涼

歌舞

遏雲歌響清回雪舞腰輕  
只要君流盼君傾國自傾

房君珊瑚散

不見姮娥影清秋守月輪  
月中閒杵白桂子搗成塵

嘲櫻桃

朱實烏含盡青樓人未歸  
南園無限樹獨自葉如幃

自況

陶令棄官後仰眠書屋中誰將五斗米擬換北窻風

蝶

孤蝶小徘徊翩翩粉翅開併應傷皎潔頻近雪中來

夜意

簾垂幕半卷枕冷被仍香如何為相憶寃夢過瀟湘

李夫人二首

一帶不結心兩股方安髻慙愧白茅人月沒教星替  
刺結茱萸枝多擘秋蓮的獨自有波光綵囊盛不得

滯雨

滯雨長安夜殘燈獨客愁故鄉雲水地歸夢不宜秋

微雨

初隨林靄動稍共夜涼分窻逼侵燈冷庭虛近水聞

高花

花將人共笑籬外露繁枝宋玉臨江宅墻低不擬窺

嘲桃

無賴妖桃面平明露井東春風為開了却擬笑春風

餞席重送從叔之梓州

莫歎萬重山君還我未還武關猶悵望何況百牢關

柳枝五首

花房與蜜脾蜂雄蛺蝶雌同時不同類那復更相思  
木是丁香樹春條結始生玉作彈棊局中心亦不平  
嘉瓜引蔓長碧玉冰寒漿東陵雖五色不忍值牙香  
柳枝井上蟠蓮葉浦中乾錦鱗與繡羽水陸有傷殘  
畫屏繡步障物物自成雙如何湖上望只見是鴛鴦

戲贈張郎

盧象

少婦石榴裙新粧白玉面能迷張公子不許時相見

送別

王之渙

楊柳東門樹青青夾御河近來攀折苦應為別離多

登鸛雀樓

白日依山盡黃河徹海流欲窮千里目更上一層樓

長相思

張繼

遼陽望河縣白首無由見海上珊瑚枝年年寄春燕

感懷

調與時人背心將靜者論終年帝城裏不識五侯門

挽歌

于鵠

陰風吹黃蒿挽歌渡秋水車馬却歸城孤墳月明裏

青樓曲

于濇

青樓臨大道一上一回老所思終不來極目傷春草

古歌二首

薛維翰

美人怨何深含情倚金閣不嘔復不語紅淚雙雙落

美人閉紅燭獨坐裁新錦頻放剪刀聲夜寒知未寢

送從弟赴上都

劉高

車騎秦城遠囊裝楚客貧月明思遠道詩罷訴何人

登相國寺閣

晴日登臨好春風各望家垂楊夾城路客思逐楊花

酬濬上人采藥見寄

玉英期共采雲嶺獨先過應得靈芝也詩情一倍多

曲水寺枳實

枳實遶僧房  
攀枝置藥囊  
洞庭山上橘  
霜落也應黃

酬問師

虛空無處所  
髣髴似琉璃  
詩境何人到  
禪心又過詩

殷秀才求詩

傾蓋見芳姿  
晴天瓊樹枝  
連城猶隱石  
唯有卞和知

行營即事

萬姓厭干戈  
三邊尚未和  
將軍誇寶劍  
功在殺人多

綠珠怨



從來上臺榭不敢倚闌干零落知成血高樓直下看

古意

達曉寢衣冷開帷霜露凝風吹昨夜淚一片枕前冰

哭蕭掄

何處哭故人青門水如箭當時水頭別從此不相見

水亭

裴夷直

歲律行將變君恩竟未回門前即潮水朝去暮常來

揚州寄諸子

千里隔煙波孤舟宿何處遙思耿耿不眠淮南夜風雨

酬盧郎中游寺見招不遇

偶出送山客不知游梵宮秋光古松下誰伴一仙翁

寓言

秋樹却逢暖未凋能幾時何須尚松桂搖動暫青枝

唁人喪侍兒

夜情何耿耿春恨草綿綿唯有常娥月從今照墓田

席上夜別張主簿

紅燭剪還明綠尊添又滿不愁前路長只畏今宵短

方丈泉

循涯不知淺見底似非深永日無波浪澄澄照我心

晚望

日下夕陰長前山凝積翠白鳥一行飛聯聯粉書字

前山

只謂一蒼翠不知猶數重晚來雲映處更見兩三峯

發交州日留題解鍊師房

久喜房廊接今成道路賒  
明朝回首處此地是天涯

令 和州買松

好覓凌霜質仍須帶雨栽  
須知剖竹日便是看松來

題斷金集後

一覽斷金集再悲埋玉人  
牙絃千古絕珠淚萬行新

長安道

鞠信陵

朱門映綠楊雙闕抵通莊  
玉珮聲逾遠紅塵猶自香

春懷舊遊

雍 陶

吟想舊經過花時奈遠何別來長自見春夢入關多

離京城宿高山作

山月吟聲苦春風引思長無由及塵土猶帶杏花香

秋館雨夜

夜雨空館靜幽人起徘徊長安醉眠客豈知新鴈來

聞子規

百鳥有啼時子規聲不歇春寒四鄰靜獨叫三更月

懷無可上人

山寺秋時後僧家夏滿時清涼多古跡幾處有新詩

長安客感

客淚如危葉長懸零落心況是悲愁日臨風制不禁

送客遙望

別遠心更苦遙將目送君光華不可見孤鶴沒秋雲

傷靡草

靡草似客心年年亦先死無由伴花落暫得因風起

木槿

劉庭琦

物情良可見人事不勝悲莫恃朝榮好君看暮落時

別輞川

王縉

山月曉仍在林風涼不絕殷勤如有情惆悵令人別

嶺外守歲

李福業

冬去更籌盡春隨斗柄回寒暄一夜隔容鬢兩年催

碧玉歌

李暇

碧玉上宮妓出入千花林珠被玳瑁牀感郎情意深

怨詩三首

羅敷初總髻蕙芳正嬌小月落始歸船春眠恒著曉  
何處期郎遊小苑花臺間相憶不可見且復乘月還  
別前花照路別後露垂葉歌舞須及時如何坐悲妾

訪法通師不遇

姚合

訪師師不遇禮佛佛無言依舊將煩惱黃昏入宅門

石碑

荒田一片石文字滿青苔不是逢閒客何人肯讀來

老馬



卧多扶不起唯向主人嘶惆悵東郊道秋來雨不泥

鶴雛

白毛生未足嶮峭醜於雞每夜穿籠出搗衣砧上栖

新菊

黃金色未足摘取且新嘗若待重陽日何時異衆香

春日游慈恩寺

年長歸何處青山未有家賞春無酒飲多看寺中花

白鼻騮

為底胡姬酒長來白鼻騮摘蓮拋水上郎意在浮花

送薛郎中往婺州

我住浙江西君去浙江東日日心來往不畏浙江風

和李舍人冬至日

獻壽人皆慶南山復北堂從今千萬日此日又初長

酬張郎中

白髮年來盡滄江歸去遲何當得攜手松下靜吟詩

別杭州

醉與江濤別江濤惜我游他年昏嫁了終路此江頭


秋中夜坐

疎散永無事不眠常夜分月中松露滴風引鶴同聞

長干曲四首

崔顥

君家何處住妾住在橫塘停船暫借問或恐是同鄉  
家臨九江水來去九江側同是長干人生小不相識  
下渚多風浪蓮舟漸覺稀那能不相待獨自逆潮歸  
三江潮水急五湖風浪涌由來花性輕莫畏蓮舟重



萬首唐人絕句卷十五

欽定四庫全書

集部

萬首唐人絕句卷

十六至  
二十五

詳校官庶吉士臣柳遵祖

助教臣常循覆勘

總校官編修臣王燕緒

校對官編修臣勵守謙

謄錄監生臣何大士

欽定四庫全書

萬首唐人絕句卷十六

宋 洪邁 編

五言

游昌化精舍

劉明獻

寶臺侵漢遠金地接霞高何必遊天外忻此契盧敖

宮詞二首

張 祐

故國三千里深宮二十年一聲河滿子雙淚落君前

自倚能歌日先皇掌上憐新聲何處唱腸斷李延年

昭君怨二首

萬里邊城遠千山行路難舉頭唯見日何處是長安  
漢庭無大議戎敵幾先和莫羨傾城色昭君恨最多

夕次竟陵

南風吹五兩日暮竟陵城腸斷巴江月夜蟬何處聲

信州水亭

南簷架短廊沙路白茫茫盡日不歸處一庭梔子香



蘇小歌三首

車輪不可遮馬足不可練長怨十字街使郎心四散  
新人千里去故人千里來剪刀橫眼底方覺淚難裁  
登山不愁峻涉海不愁深中擘庭前棗教郎見赤心

樹中草

青青樹中草託根非不危草生樹却死榮枯君可知

七里瀨漁家

七里垂釣叟還傍釣臺居莫恨無名姓嚴陵不賣魚

讀曲歌五首

窻中獨自起簾外獨自行愁見蜘蛛織尋思直到明  
碓上米不舂窻中絲罷絡看渠駕去車定是無四角  
不見心相許徒云脚漫勤摘荷空摘葉是底採蓮人  
窻外山魘立知渠脚不多三更機底下摸着是誰梭  
郎去摘黃瓜郎來收赤棗郎耕種麻地今作西舍道

玉樹後庭花

輕車何草草獨唱後庭花玉座誰為主徒悲張麗華

莫愁樂

儂居石城下郎到石城遊  
自郎石城出長在石城頭

襄陽樂

大堤花月夜長江春水流  
東風正上信春夜特來遊

自君之出矣

自君之出矣萬物看成古  
千尋葦蘆枝爭奈長長苦

夢江南

行吟洞庭句不見洞庭人  
盡日碧江夢江南紅樹春

將離岳州留獻徐員外

高齋長對酒下客亦霑魚不為江南去還來郡北居

題彭澤盧明府新樓

碧落新樓迥清池古樹間先賢盡為宰空看縣南山

贈禪師

坐見三生事宗傳一衲來已知無法說心向定中灰

江南逢故人

河洛多塵事江山半舊游春風故人夜又醉白蘋洲

松江懷古

碧樹吳洲遠青山震澤深無人蹤  
范蠡煙水暮沉沉

登鸛雀樓

暢當

迥臨飛鳥上高出世人間天勢圍  
平野河流入斷山

雜怨

聶夷中

良人昨日去明月又不圓別時各  
有淚零落青樓前

烏夜啼

衆鳥各歸枝烏鳥爾不棲還應知  
妾恨故向綠窓啼

起夜來

念遠心如燒不覺中夜起  
桃花帶露泛立在月明裏

古別離

欲別牽郎衣問郎遊何處  
不恨歸日遲莫向臨卞去

長安道

此地無駐馬夜中猶走輪  
所以路傍草少於衣上塵

銅雀妓

朱放

恨唱歌聲咽愁翻舞袖遲  
西陵日欲暮是妾斷腸時

自君之出矣

辛洪智

自君之出矣絃吹絕無聲  
思君如百草撩亂逐春生

中書寓直

楊師道

雲暗蒼龍闕沉沉殊未開  
窻臨鳳凰沼颯颯雨聲來

送僧南遊

鮑溶

且攀隋宮柳莫惜江南春  
師有懷鄉志未為無事人

玉清壇

上陽宮裏女玉色楚人多  
西信無因得東遊奈樂何

酬江公見寄

曾答鴈門偈為憐同社人多慙  
惠休日偕得比陽春

酬范侍御六首

雲髻鳳文鈿對君歌少年萬金酬一醉  
莫惜十千錢  
玉管傾杯樂春園鬪草情  
野花無限意處處逐行人  
聞道山中酒一杯  
千日醒黃鶯似傳語  
勸酒太丁寧  
紅袂歌聲起因君始得聞  
黃昏小垂手與我駐浮雲  
相勸醉年華莫醒春日斜  
春風宛陵道萬里晉陽花



歲日勸屠蘇楚聲山鷓鴣春風入君意千日不須臾

山居

窈窕垂澗蘿蒙茸采葛花鴛鴦憐碧水照影舞金沙

送靈一上人

陳羽

十年勞遠別一笑喜相逢又上青山去青山千萬重

樂府

崔國輔

朝日照紅粧擬上銅雀臺畫眉猶未了魏帝使人催

採蓮曲

玉淑花紅發金塘水碧流相逢畏相失並著采蓮舟

王孫遊

自與王孫別頓看黃鳥飛應由春草誤著處不成歸

妾薄命

雖入秦帝宮不上秦帝床夜夜玉窻裏與他卷羅裳

王昭君

漢使南還盡邊庭妾獨存紫臺絲望絕秋草不堪論

子夜冬歌

寂寥抱寒心，裁羅衣，聚聚夜久頻挑燈，霜寒剪刀冷。

襄陽曲二首

蕙草嬌紅萼，時光舞碧鷄，城中美年少，相見白銅鞮。  
少年襄陽地，來往襄陽城，城中輕薄子，知妾解秦箏。

麗人曲

紅顏稱絕代，欲並真無侶，獨有鏡中人，由來自相許。

今別離

送別未能旋，相望連水口，船行欲映舟，幾度急搖手。

小長干曲

月暗送潮風相尋路不通菱歌唱不輟知在此塘中

怨詞二首

樓前桃李疎池上芙蓉落織錦猶未成蟲聲入羅幕  
妾有羅衣裳秦王在時作為舞春風多秋來不堪著

少年行

遺却珊瑚鞭白馬嬌不行章臺折楊柳春日路傍情

中流曲

歸時日尚早更欲向芳洲渡口水流急回船不自由

送韓十四被魯王推遷往濟南

西候情何極南冠怨有餘梁王雖好事不察獄中書

渭水西別李崱

隴外長亭堠山深古塞秋不知嗚咽水何事向西流

偶題

高堯藩

越女收龍眼蠻兒拾象牙長安千萬里走馬送家家

貧女

張碧

豈是昧容華，豈不知機織。自是生寒門，良媒不相識。

幽思

金爐煙靄微，銀缸殘影滅。出戶獨徘徊，落花滿明月。

題西施浣紗石

胡幽正

一朝入紫宮，萬古遺芳塵。至今溪邊花，不敢嬌青春。

歸四明

海色連四明，仙舟去容易。天籍豈輒問，不是卑朝士。

李舍人惠家醞

竇牟

禁鎖天漿嫩  
虞行夜日寒  
一瓢那可醉  
應遣試嘗看

草堂夜坐

竇羣

匣中三尺劍  
天上少微星  
勿謂相去遠  
壯心曾不停

觀畫鶴

華亭不相識  
衛國復誰知  
悵望冲天羽  
甘心任畫師

遊仙詞

竇鞏

海上神山綠  
溪邊杏樹紅  
不知何處去  
月照玉樓空

過二妃廟

崔塗

殘陽楚水畔，獨弔舜時人。不及廟前草，至今江上春。

送友人

登高迎送遠，春恨併依依。不得滄洲信，空看白鶴歸。

擗聲

煙外撓聲遠，天涯客夢回。爭知江上客，不是故鄉來。

新成小亭月夜

熊孺登

已被月知處，斬新風到來。無人伴幽境，多取木蘭栽。

贈空禪師

喻鳧



虎見修行久，松知夏臘高。寒堂坐風雨，瞑目尚波濤。

西山寒日逢韋侍御

獬廌霜中兒，龍鍾病後顏。淒傷此身事，風雪動江山。

偶題禪院

無花地亦香，有鶴松多直。向北奚必孤，山僧盡相識。

感寓

江鄉十年別，京國累日同。在客幾多事，俱付酒杯中。

晚思

鶴下紫閣雲沉沉翠微雨獨坐正無言孤莊數聲杵

驚秋

鶯轉才間闕蟬鳴旋蕭屑如何兩鬢毛不作千枝雪

贈桂林友人

李 頎

君家桂林下日伐桂林炊何事東堂桂年年待一枝

題長孫桐樹

一去龍門側千年鳳影移空餘剪圭處無復在孫枝

渡漢江

嶺外音書絕經年復歷春  
近鄉情更怯不敢問來人

嵩山夜還

家住東臯下好采舊山薇  
自省遊泉石何曾不夜歸

長安感懷

一第知何日全家待此身  
空將灞陵酒酌送向東人

和友人落第將歸感懷

帝里無春意歸山對物華  
即應來到日九陌踏槐花

遊蜀日簡友人

別來十二月去到漏天邊不是因逢閏須知己隔年

聞北兵入靈州二首

河冰一夜合敵騎滿靈州歲歲徵兵去徒防塞草秋  
見說靈州戰沙中血不乾將身歸告急走馬向長安

終南山望餘雪

祖詠

終南陰嶺秀積雪浮雲端林表明霽色城中增暮寒

留別王維

崔興宗

駐馬欲分襟清寒御溝上前山景氣佳獨往還惆悵

地肺山春日

溫庭筠

萋萋花明岸  
涓涓水遶山  
幾時拋俗事  
來共白雲閒

碧澗驛曉思

香燈伴殘夢  
楚國在天涯  
月落子規歇  
滿庭山杏花

敷水小桃

敷水小橋東  
娟娟照露叢  
所嗟非勝地  
堪恨是春風

哭李羣玉

段成式

曾話黃陵事  
今為白日催  
老無兒女累  
誰哭到泉臺

金陵懷古

司空文明

輦路江楓暗宮潮野草春傷心庾開府老作北朝臣

吳聲子夜歌

薛竒重

淨掃黃金階飛霜皎如雪下簾彈箜篌不忍見秋月

萬首唐人絕句卷十六

欽定四庫全書

萬首唐人絕句卷十七

宋 洪邁 編

五言 原缺

萬首唐人絕句卷十七



欽定四庫全書

萬首唐人絕句卷十八

宋 洪邁 編

五言

中秋

司空圖

聞吟秋景外萬事覺悠悠此夜若無月一年虛過秋

偶題

水榭花繁處春情日午前鳥窺臨檻鏡馬過隔牆鞭

閒步

幾處白煙斷一川紅樹時  
壞橋侵轍水殘照背村碑

春中

伏溜侵堦潤繁花隔竹香  
嬌鶯方曉聽無事過南塘

獨望

綠樹連村暗黃花出陌稀  
遠陂春草綠猶有水禽飛

雜題

孤枕聞鶯起幽懷獨悄然  
地融春力潤花泛曉光鮮

漫題三首

亂後他鄉節，燒殘故國春。  
自憐垂白首，猶伴踏青人。  
齒落傷情久，心驚健忘頻。  
蝸廬經歲客，蠶市異鄉人。  
率怕人書謹，閒宜酒韻高。  
山林若無慮，名利不難逃。

河上二首

慘慘日將暮，驅羸獨到莊。  
沙痕傍壑落，風色入牛羊。  
新霽田園處，夕陽禾黍明。  
沙村平見水，深巷有鷗聲。

早朝

白日新年好青春上國多街平雙闕近塵起五雲和

即事二首

茶爽添詩句天清瑩道心只留鶴一隻此外是空林  
御禮徵竒策人心注盛時從來留振滯只待濟臨危

永夜

永夜疑無日危時只賴山曠懷休戚外孤跡是非間

秦關

形勝今雖在荒涼恨不窮虎狼秦國破狐兔漢陵空

渡江

秋江共僧渡鄉淚滴船回一夜吳船夢家書立馬開

退居漫題七首

花缺傷難綴鶯喧奈細聽惜春春已晚珍重草青青  
堤柳自綿綿幽人無恨牽只憂詩病發莫寄校書牋  
燕語曾來客花催欲別人莫愁春又過看着又新春  
身外都無事山中久避喧破巢看乳燕留果待啼猿  
詩家通籍美工部與司勳高賈雖難敵微官偶勝君

努力省前非人生上壽稀青雲無直道暗室有危機  
燕拙營巢苦魚貪觸網驚豈緣身外事亦似我勞形

即事九首

宿雨川原霽憑高景物新  
陂痕侵牧馬雲影帶耕人  
十年深隱地一雨太平心  
匣溢休看劍窻明復上琴  
明時那棄置多病自遲留  
踈磬和吟斷殘燈照卧幽  
衰鬢聞生少丹梯望覺危  
松須依石長鶴不傍人卑  
落葉頻驚鹿連峯欲映鵑  
此生詩病苦此病更蕭條

旅思又驚夏庭前長小松遠峯生貴氣殘月歛衰容  
林鳥頻窺靜家人亦笑慵舊居留穩枕歸卧聽秋鐘  
華宇知難保燒來又却修只應巢燕惜未必主人留  
幽鳥穿籬去隣翁採藥迴雲從潭底出花向佛前開

松滋渡二首

步上短亭久看迴官渡船江鄉宜晚霽楚老語豐年  
楚岫積鄉思茫茫歸路迷更堪斑竹驛初聽鷓鴣啼

華清宮

帝業山河固，離宮宴幸頻。豈知驅戰馬，只是太平人。

牛頭寺

終南最佳處，禪誦出青霄。羣木澄幽寂，疎煙汎寂寥。  
感時上廬相

兵待皇威振，人隨國步安。萬方休望幸，封岳始鳴鑾。

亂後三首

喪亂家難保，艱虞病懶醫。空將憂國淚，猶擬洒丹墀。  
流芳能幾日，惆悵又聞蟬。行在多新貴，幽棲獨長年。



世事嘗艱險僧居慣寂寥  
美香聞夜合清景見寅朝

秋景

景物皆難駐傷春復怨秋  
旋書紅葉落擬畫碧雲收

避亂

亂離身偶在竄跡任浮沉  
虎暴荒居迥螢孤黑夜深

長亭

梅雨和鄉淚終年共酒衣  
殷勤華表鶴羨爾亦曾歸

村西杏花二首

薄膩力偏羸看看愴別時東風狂不惜西子病難醫  
肌細分紅脉香濃破紫苞無因留得翫爭忍折來拋

獨坐

幽徑入桑麻塢西逢一家編籬薪帶璽補屋草和花

借居

借住郊園久仍逢夏景新綠苔行屐穩黃鳥傍窻頻

重陽

菊開猶阻雨蝶意切於人亦應知暮節不比惜殘春

偶書五首

衰謝當何憾，惟應悔壯圖。  
磬聲花外遠，人影塔前孤。  
色變鶯雛長，竿齊筴擇垂。  
白頭身偶在，清夏景還移。  
蜀畫輕成妙，吳娃狎共纖。  
晚粧留拜月，卷上水精簾。  
獨步荒郊暮，沉思遠墅幽。  
平生多少事，彈指一時休。  
掩謗知迎吠，欺心見強顏。  
有名人易困，無契債難還。

雜題九首

病來勝未病，名縛便忘名。  
今日甘爲客，當時注惣征。

暑濕深山雨荒居破屋燈此生無憾處此去作高僧  
不須頻悵望且喜脫喧囂亦有終焉意陂南看稻苗  
樓帶猿吟迴庭容鶴舞寬照書因閱畫封藥偶和丹  
宴罷論詩久亭高拜表頻岸香蕃舶月洲色海煙春  
驛步堤縈閣軍城鼓振橋鷗和湖鴈下雪隔嶺梅飄  
帶雲南山道和鐘北闕明太平當共賀開化喝來聲  
舴艋猿偷上蜻蜓燕競飛樵香燒桂子苔濕挂莎衣  
溪漲渙家近煙收鳥道高松花飄可惜睡裏酒離騷

古樂府

一葉隨西風君行亦向東  
知妾飛書意無勞待早鴻

有感

燈影看鬚黑牆陰惜草青  
歲闌悲物我同是冒霜螢

休休亭

且喜安能保那堪病更憂  
可憐藜杖者真箇種瓜侯

漫書二首

剩欲逢花折須判冒雨頻  
晴明開漸少莫怕濕新巾

卷十八  
小蝶爾何競追飛不憚勞遠教羣雀見寧悟禍梯高

歲盡二首

明日添一歲端憂奈爾何衝寒出洞口猶校夕陽多  
莫話傷心事投春滿鬢霜殷勤共尊酒今歲尺殘陽

牡丹

得地牡丹盛曉添龍麝香主人猶自惜錦幕護春霜

亂後

羽書傳棧道風火隔鄉關病眼那堪泣傷心不到閒

春山

可是武陵溪春芳着處迷花明催曙早雲膩惹空低

樂府

寶馬跋塵光雙馳照路旁喧傳報戚里明日幸長楊

亂前上盧相

寇點雖多變兵驕即易乘猶須勞斥候勿遣大河冰

金谷園

曹松

當年歌舞時不說草離離今日歌舞盡滿園秋露垂

寒食日題杜鵑花

一朵又一朵併開寒食時  
誰家不禁火總在此花枝

春草

不獨滿池塘夢中佳句香  
春風有餘力引上古城墻

春日東齋

三庚到秋伏偶來松檻立  
熱少清風多開門放山入

南朝

三籬蓋馳道風烈一無取  
時見牧牛童嗔牛喫禾黍



賀顧非熊及第

劉得仁

愚爲童稚時已解念君詩及得高科晚須逢聖主知

述懷

崔櫓

白首成何事無歡可替悲空餘酒中興猶似少年時

望歸馬

劉駕

東人望歸馬歸馬蓮峯下蓮峯與地平亦不更徵兵

田西邊

刀劔作犂鋤耕田古城下高秋黍稷多無地放羊馬

樂邊人

在鄉身亦勞在邊腹亦飽父兄若一處任向邊頭老

築臺詞

前杵與後杵築城功不住願我築更高得見秦皇墓

秦娥

秦娥十四五面白於指瓜羞人夜采桑驚起戴勝鳥

牧童

牧童見客拜山果懷中落晝日驅牛歸前溪風雨惡

賞殘花

紇子著

零落多依草  
芳香散著人  
低簷一枝在  
猶占滿堂春

遇邊使

盧隱

累年無的信  
每夜夢邊城  
袖掩千行淚  
書封一尺情

移住別友

自到西川住  
唯君別有情  
常逢對門遠  
又隔一重城

朔口逢友人

艱難別離久  
中外往還深  
已改當時髮  
空餘舊日心

採蓮女

霍總

舟中採蓮女兩兩催粧梳聞早渡江去日高來起居

邊城柳

劉阜

一株新柳色十里斷孤城爲近東西路長懸離別情

江濱梅

王適

忽見寒梅樹開花漢水濱不知春色早疑是弄珠人

感事

武瓘

花開蝶滿枝花謝蝶還希唯有舊巢燕主人貧亦歸

江行

柳中庸

繁陰乍隱洲落葉初飛浦  
蕭蕭楚客帆暮入寒江雨

別童叟

吳筠

平昔同邑里經年不相思  
今日成遠別相對心悽其

題縉雲嶺永望館

人敬焉此路險我愛山前深  
猶恐佳趣盡欲行且沉吟

題山人所居

故人住南郭邀我對芳樽  
歡暢日云暮不知城市喧

萬首唐人絕句卷十八

欽定四庫全書

萬首唐人絕句卷十九

宋 洪邁 編

五言

春情

張起

畫閣餘寒在  
新年舊燕歸  
梅花猶帶雪  
未得試春衣

題嘉祥驛

孟遜

樹頂煙微綠  
山根菊暗香  
何人獨鞭馬  
落日嘉祥

徐波渡

曉月千重樹春煙十里溪  
過來還過去此路不堪迷

壯士吟

壯士何曾悲悲即無回期  
如何易水上未歌淚先垂

懷鄭洵

風蘭舞幽香雨葉墮空滴  
美人來不來前山看向夕

飲散呈主人

夢覺笙歌散空堂寂寞秋  
更聞城角弄煙雨不勝愁



即事

亂世時偏促，陰天日易昏。  
無言搔白首，憔悴倚東門。

勉兒子

養爾逢多難，常憂學已遲。  
辟疆爲上相，何必待從師。

春早

聞鶯纔覺曉，開戶已知晴。  
一帶窻間日，斜穿枕上明。

贈姬人

莫恨紅裙破，休嫌白屋低。  
請看京與洛，誰在舊香闥。

尋人偶題

邵真

日昃不復午落花難歸樹人生能幾何莫厭相逢遇

登嶺望

許鼎

森森三江水悠悠五嶺間鴈來猶不度人去若爲還

對月

張喬

盈缺青冥外東風萬古吹何人種丹桂不長出輪枝

題殿前桂葉

盧僎

桂樹生南海芳香隔遠山今朝天上見疑是月中攀

南樓望

去國三巴遠登樓萬里春  
傷心江上客不是故鄉人

臨川送別

秋郊日半隱野樹煙初映  
風水正蕭條那堪動離詠

途中

抱玉三朝楚懷書十上秦  
年年洛陽陌花鳥弄歸人

小院

唐彥謙

小院無人夜煙斜月轉  
明清宵易惆悵不必有離情

春雪初霽杏花正芳月夜閒吟

霽景明如練繁英杏正芳  
姮娥應有語悔共雪爭光

文惠宮人

認得前家令宮人淚滿裾  
不知梁佐命全是沈尚書

贈竇尊師

我愛竇高士棄官仍在家  
爲嫌勾漏令兼不要丹砂

南海神詞

高駢

滄溟八千里今古畏波濤  
此日征南將安然渡萬艘

送春

水淺魚爭躍花深鳥競啼春光看欲盡判却醉如泥

海翻

幾經人事變又見海濤翻徒起如山浪何曾洗至冤

筇竹杖寄僧

堅輕筇竹杖一枝有九節寄與沃州人閒步青山月

遣興

把盞非憐酒持竿不爲魚唯應嵇叔夜似我性慵疎

登蕪城

儲嗣宗

昔人登此地丘壘已前悲今日又非昔春風能幾時

滄浪峽

滄浪臨古道道上石成塵自有滄浪峽誰爲無事人

垓城

百戰未言非派軍驚夜圍山河意氣盡淚濺美人衣

村月

月午離南道前村半隱林田翁獨歸處喬麥露花深

早春

野樹花初發空山獨見時  
踟蹰歷陽道鄉思滿南枝

送春

無語共春別細嘗枝上紅  
來年又相見還恐是愁中

自君之出矣

雍裕之

自君之出矣寶鏡爲誰明  
思君如隴水長聞嗚咽聲

錦

薛瑩

軋軋弄寒機功多力漸微  
惟憂機上錦不稱舞人衣

羨僧

處世曾無着生前事盡非一餅兼一衲南北去如歸

秋日湖上

落日五湖遊煙波處處愁沉浮千古事誰與問東流

寄舊山隱侶

舊山諸隱淪身在若無身莫鎖白雲路白雲多悞人

訪武陵道者不遇

花發鳥仍啼行行路欲迷二真無問處虛度武陵溪



江山閒望

渺渺無窮盡風濤幾日平年光與人事東去一聲聲

滿公房

綦母潛

世界蓮華藏行人香火緣燈王照不盡中夜寂相傳

效崔國輔體四首

韓偓

淡月照中庭海棠花自落獨立俯閒階風動秋千索  
酒力惹睡眸鹵莽聞街鼓欲明花更寒東風打窻雨  
羅幕生春寒繡窻愁未眠南湖夜半雨應濕采蓮船

雨後碧苔院霜來紅葉樓  
閒階上斜日鸚鵡伴人愁

半睡

擡鏡仍嫌重更衣又怕寒  
宵分未歸帳半睡待郎看

早歸

去是黃昏後歸當朦朧時  
袂衣吟宿醉風露動相思

兩處

樓上淡山橫樓前溝水清  
憐山又憐水兩處總牽情

春閨二首

願結交加夢因傾瀲灩尊醒來情緒惡簾外正黃昏  
氤氳帳裏香薄睡睡時拊長吁解羅帶怯見上空牀

花時與錢尊師同醉

在醴陵

橋下淺深水竹間紅白花酒仙同避世何用厭長沙

從獵三首

獵犬諳斜路宮嬪識畫旗馬前雙兔走宣示羽林兒  
小鎗狹鞞鞞輕妓細腰有時齊走馬也學唱交交  
蹀躞巴驛駮陪總碧野雞忽聞仙樂動賜酒玉偏提

與僧

江海扁舟客雲山一食僧  
相逢兩相語若箇是南能

野釣

細雨桃花水輕漚逆浪飛  
風頭歸棹坐睡倚蓑衣

迎內子題庭花

芍藥斬新栽當庭數朶開  
東風與拘束留待細君來

題奉國寺

新秋夜何爽露下風轉淒  
一磬竹窗外千燈花塔西

題龍門寺

窻燈林霽謁裏門磬水聲中更與龍花會  
鑪烟滿席風

寄早梅

陸 開

折梅逢驛使寄與隴頭人江南無所有  
聊贈一枝春

子夜冬歌

薛 耀

朔風扣羣木嚴霜凋百草借問月中人  
安得長不老

感事

高 蟾

濁河從北下清洛向東流清濁皆如此  
何人不白頭

楚思

疊浪與雲急翠蘭和意香風流化爲雨日暮下巫陽

雲中

金閣倚雲開朱軒犯雲來三冬辛苦樣天意似難裁

道中有感

一醉六十日一裘三十年年華經幾日日日掉征鞭

宋汴道中

平野有千里居人無一家甲兵年正少日久戍天涯

秋思

天地太蕭索山川何渺茫不堪星斗柄猶把歲寒量

即事

三年離水石一旦隱樵漁為問青雲上何人識卷舒

漁家

野水千年在閒花一夕空近來浮世狹何似釣船中

閒中

風雨去愁晚關河歸思涼西遊無直氣一夕九回腸

歸思

紫府歸期斷芳洲別思迢黃金作人世只被歲寒消

送王郎中

惜別遠相送却成惆悵多獨歸回首處爭奈暮山何

感興

禾黍不暘艷競栽桃李春翻令力耕者多作賣花人

望湖亭

湘水似伊水湘人非故人登臨獨無語風柳自搖春



采桑

曉陌携籠去桑林路隔淮何如鬪百草賄取鳳凰釵

悶題

落第春相困無心惜落花荆山歸不得歸得亦無家

牡丹

亂前看不足亂後眼偏明却得蓬蒿力遮藏見太平

玉蘂花

唐昌樹已荒天意眷文昌晚入微風起春時雪滿墻

嘉陵

細雨濕淒淒人稀江日西春腸已愁斷不待子規啼

山中即事

郎士元

入谷多春興乘舟棹碧潄山雲昨夜雨溪水曉來深

正朝上左丞

楊重玄

歲去愁終在春還命不來長吁問丞相東閣幾時開

雲

羅隱

盡道豐年瑞豐年事若何長安有貧者爲瑞不宜多

寄陸魚目望

龍樓李丞相昔歲仰高文黃閣今無主青山竟不焚

登郭隗臺

皇甫松

燕相謀在茲積金黃巍巍上者欲何顏使我千載悲

塞上

周朴

受降城必破回落隴頭移蕃道北海北謀生今始知

感寓

杜荀鶴

大海波濤淺小人方寸深海枯終見底人心不知心

春閨怨

朝喜花艷春暮悲花委塵不悲花落早悲妾似花身

釣叟

茅屋深灣裏釣船橫竹門經營衣食外猶得弄兒孫

馬上作

五里復五里住時無住時日將家漸遠猶恨馬行遲

幽情

李收

幽人惜春暮潭上折芳草佳期何時還欲寄千里道

感事

王 鐔

擊石易得火扣人難動心今日朱門者曾恨朱門深

羅噴曲六首

劉采春

不喜秦淮水生憎江上船載兒夫壻去經歲又經年  
借問東園柳枯來得幾年自無枝葉分莫怨太陽偏  
莫作商人婦金釵當卜錢朝朝江口望錯忍幾人船  
卽年離別日只道住桐廬桐廬人不見今得廣州書  
昨日勝今日今年老去年黃河清有日白髮黑無緣

昨日北風寒牽船浦裏安潮來打纜斷搖櫓始知難

南歌子詞三首

裴誠

不知厨中弗爭如炙裏心井邊銀釧落展轉恨還深  
不信長相憶擡頭取問天風吹荷葉動無夜不搖蓮  
簞蠟爲紅燭知情不自由細絲斜結網爭柰眼相鉤

萬首唐人絕句卷十九